

# **DOF PERKUKUH PEMULIHARAAN PERIKANAN DARAT, 32,000 BENIH IKAN DILEPASKAN DI JERANTUT**

**BERNAMA News | Berita Dalam Negeri | 18/07/2026 | Author: ANIS NABILLA MD WAZILAH | Others**

KUANTAN, 18 Julai (Bernama) -- Jabatan Perikanan (DOF) terus memperkukuh usaha pemuliharaan sumber perikanan darat dengan melepaskan sebanyak 32,000 benih ikan tempatan ke habitat semula jadi di Santuari Ikan Kuala Sat, Jerantut hari ini.

Program melepaskan ikan kelah dan lampam sungai itu ialah sebahagian daripada komitmen berterusan DOF dalam memulihkan populasi ikan asli, memperkaya sumber perikanan darat dan memastikan keseimbangan ekosistem perairan terus terpelihara.

Ketua Pengarah Perikanan Datuk Adnan Hussain dalam kenyataan berkata usaha berkenaan bukan sahaja memberikan fokus kepada perlindungan spesies ikan asli, malah turut memastikan sumber perikanan dapat memberikan manfaat kepada masyarakat melalui pembangunan ekopelancongan dan pengukuhan ekonomi komuniti.

"Pelepasan benih ikan kelah dan lampam sungai merupakan komitmen jabatan ini dalam memulihkan populasi ikan tempatan serta memelihara khazanah biodiversiti negara," katanya.

Dalam pada itu, beliau turut menyeru orang ramai supaya tidak melepaskan spesies ikan asing ke sungai, tasik atau mana-mana perairan umum kerana tindakan itu boleh mengancam spesies ikan asli dan mengganggu keseimbangan ekosistem.

Beliau berkata sekiranya ingin melaksanakan program pelepasan ikan, orang ramai diminta merujuk kepada Pejabat Perikanan berhampiran untuk mendapatkan panduan teknikal yang betul.

Dalam kenyataan sama, DOF memaklumkan setakat Jun lepas, jabatan itu telah melaksanakan pelepasan sebanyak 2,741,652 ekor benih ikan asli di seluruh negara, dengan 941,510 ekor daripadanya dilepaskan di Pahang.

Usaha ini menunjukkan kesungguhan kerajaan dalam memastikan kelestarian sumber perikanan darat serta pemulihan stok ikan asli untuk manfaat generasi akan datang.

Di samping itu, sektor perikanan darat negara pada 2025 merekodkan jumlah pendaratan sebanyak 9,912.19 tan metrik dengan nilai keseluruhan lebih RM200 juta.

-- BERNAMA

TAG: Pahang, benih ikan, Jerantut, DOF, perikanan

ANW ANW HAZ